



თბილისის თავისუფალი უნივერსიტეტი

სტუდენტის ეთიკის კოდექსი

თბილისი,  
2013 წელი

# სტუდენტის ეთიკის კოდექსი

## მუხლი 1. სტუდენტის ეთიკის კოდექსის პრინციპები

- 1.1. თბილისის თავისუფალი უნივერსიტეტის ყველა სტუდენტი თანაბრად სარგებლობს საქართველოს კანონმდებლობით, უნივერსიტეტის წესდებითა და უნივერსიტეტის სხვა მარეგულირებელი აქტებით მისთვის მინიჭებული უფლებებით.
- 1.2. სტუდენტი სრულად იზიარებს უნივერსიტეტის წესდების, გამოცდების ჩატარების წესისა და სტუდენტის ეთიკის კოდექსით გათვალისწინებულ დებულებებს, ღირებულებებსა და პრინციპებს და განუხრელად იცავს მათ.
- 1.3. სტუდენტის ეთიკის კოდექსის დარღვევის შემთხვევაში, თბილისის თავისუფალი უნივერსიტეტის აკადემიური საბჭო განიხილავს სტუდენტის დისციპლინური პასუხისმგებლობის საკითხს; ხოლო სტუდენტი ვალდებულია შეასრულოს მიღებული გადაწყვეტილება.
- 1.4. უნივერსიტეტი მიიჩნევს, რომ სტუდენტი არის თავისუფალი და დამოუკიდებელი პიროვნება და აქვს უნარი, თავად შეაფასოს საკუთარი ქცევა და განსაზღვროს ამ ქცევის შედეგები.
- 1.5. სტუდენტის მიმართ დისციპლინური ზომები გამოიყენება ამ კოდექსით დადგენილი ეთიკის საერთო წესებისა და აკადემიურ პროცესთან დაკავშირებული წესების დარღვევის შემთხვევაში.

## მუხლი 2. სტუდენტის ვალდებულებები

- 2.1. სტუდენტი პატივს სცემს საკუთარი და სხვა ადამიანის სიცოცხლეს, ჯანმრთელობას, ღირსებას, ასევე მათ პირად ქონებრივ და არაქონებრივ უფლებებს.
- 2.2. აკრძალულია სხვა პირის დისკრიმინაცია ან მისადმი არატოლერანტული დამოკიდებულობა ნებისმიერი განსხვავებულობის გამო - რასის, კანის ფერის, ენის, სქესის, სექსუალური ორიენტაციის, გენდერული იდენტობის, ასაკის, რელიგიის, რწმენის, მსოფლმხედველობის, პოლიტიკური ან სხვა შეხედულების, პოლიტიკური გაერთიანების წევრობის, შეზღუდული შესაძლებლობის, მოქალაქეობის, ეროვნული, კულტურული კუთვნილების, ეთნიკური ან სოციალური კუთვნილების, წარმოშობის, ოჯახური, ქონებრივი და წოდებრივი მდგომარეობის, საცხოვრებელი ადგილის, ჯანმრთელობის მდგომარეობის, ცხოვრების წესის, დაბადების ადგილის, ასაკის ან ნებისმიერი სხვა ნიშნის საფუძველზე.
- 2.3. სტუდენტი პატივს სცემს უნივერსიტეტის სახელს, პატივსა და საქმიან რეპუტაციას, ასევე, უფრთხილდება უნივერსიტეტის ქონებას.
- 2.4. სტუდენტი პატივს სცემს სხვა სტუდენტების სწავლის უფლებას და სასწავლო პროცესის ხელშეუხებლობას.

2.5. სტუდენტი აღიარებს და იცავს უნივერსიტეტის წესდებით, გამოცდების ჩატარების წესით, უნივერსიტეტის სხვა მარეგულირებელი დოკუმენტებითა და ამ კოდექსით დადგენილ წესებსა და პირობებს.

### მუხლი 3. ეთიკის საერთო წესები

3.1. ეს კოდექსი ადგენს სტუდენტის ეთიკის საერთო წესებს, რომელთა დაცვა სავალდებულოა უნივერსიტეტის თითოეული სტუდენტისათვის.

3.2. ეთიკის საერთო წესების დარღვევად მიიჩნევა უნივერსიტეტის ტერიტორიაზე განხორციელებული შემდეგი ქმედებები:

3.2.1. სასწავლო პროცესის მიმდინარეობისათვის ხელის შეშლა;

3.2.2. თამბაქოს მოწევა შენობაში ან საამისოდ ნებადართული ტერიტორიის ფარგლებს გარეთ;

3.2.3. ალკოჰოლური სასმელების შეტანა, გავრცელება ან/და მოხმარება, თუ ღონისძიება სპეციალურად არ არის ორგანიზებული ან ნებადართული უნივერსიტეტის მიერ;

3.2.4. აზარტული თამაშების ორგანიზება ან მათში მონაწილეობის მიღება;

3.2.5. უნივერსიტეტის ქონების დაზიანება;

3.2.6. უნივერსიტეტის ტერიტორიის დანაგვიანება;

3.2.7. დემონსტრაციული ბილწისტიყვაობა;

3.2.8. სიტყვიერი შეურაცხყოფის მიყენება სხვა პირისათვის;

3.2.9. სხვა პირის მიმართ ძალადობა ან მისთვის ფიზიკური შეურაცხყოფის მიყენება;

3.2.10. ნარკოტიკული ან/და ფსიქოტროპული საშუალებების შეტანა, გავრცელება ან/და გამოყენება;

3.2.11. „იარაღის შესახებ“ საქართველოს კანონით განსაზღვრული ცეცხლსასროლი/ცივი იარაღის შეტანა, გამოყენება, სხვისთვის გადაცემა;

3.2.12. ისეთი ფეთქებადი და აალებადი ნივთებისა და ნივთიერებების შეტანა, გამოყენება, გავრცელება ან სხვისთვის გადაცემა, რომლებიც ხანძრის ან/და აფეთქების რეალურ საფრთხეს ქმნის;

3.2.13. სხვა პირზე ფსიქოლოგიური ზეწოლა, მუქარა, დაშინება ან მორალური ზემოქმედება.

3.2.14. სხვა პირის დისკრიმინაცია (დისკრიმინაციად ითვლება პირის პირდაპირ ან არაპირდაპირ შევიწროება, რომელიც მიზნად ისახავს ან იწვევს მისთვის დამაშინებელი, მტრული, დამამცირებელი, ღირსების შემლახველი ან შეურაცხმყოფელი გარემოს შექმნას, ანდა პირისთვის ისეთი პირობების შექმნა, რომლებიც პირდაპირ ან არაპირდაპირ აუარესებს მის მდგომარეობას ანალოგიურ პირობებში მყოფ სხვა პირთან შედარებით, ამ კოდექსის 2.2 პუნქტში მოცემული საფუძვლით).

3.2.15. სხვა სტუდენტის საკუთრების ხელყოფა, დაზიანება ან განადგურება; ასევე, სხვა სტუდენტის საკუთრების უფლების რაიმე სახით შეზღუდვა, მათ შორის, ნივთის დაუფლება და ფაქტობრივი ფლობა მესაკუთრის ნების საწინააღმდეგოდ, ნივთის მოტყუებით გამორთმევა ან გამოძალვა, ან ნივთის ბედის სხვაგვარი გადაწყვეტა, ასევე ზემოაღნიშნულ ქმედებათა მცდელობა, მათ შორის, ჩადენილი მოტყუებით ან მუქარით.

#### **მუხლი 4. პასუხისმგებლობა ეთიკის საერთო წესების დარღვევისათვის**

4.1. ამ კოდექსის მე-3 მუხლით გათვალისწინებული ქმედების ჩადენის გამო სტუდენტის პასუხისმგებლობის სახესა და ზომას კონკრეტული დარღვევის შინაარსის, ხასიათისა და გარემოებების გათვალისწინებით, განსაზღვრავს უნივერსიტეტის აკადემიური საბჭო.

4.2. ამ კოდექსის 3.2.1 (სასწავლო პროცესის მიმდინარეობისათვის ხელის შეშლა), 3.2.7 (დემონსტრაციული და უხეში ბილწისიტყვაობა) და 3.2.8 (სიტყვიერი შეურაცხყოფის მიყენება სხვა პირისათვის) პუნქტებში აღნიშნული ქმედებების ჩადენისას უნივერსიტეტის აკადემიური საბჭო იღებს სტუდენტის წერილობითი გაფრთხილების გადაწყვეტილებას, რომელსაც გადასცემს უნივერსიტეტის სარეგისტრაციო ოფისს სტუდენტის შესახებ არსებულ აკადემიურ ჩანაწერებში რეგისტრაციის მიზნით. ამ ქმედებების შემჩნევისას, მათი აღკვეთის მიზნით, უნივერსიტეტის ადმინისტრაციის წარმომადგენელსა და აკადემიურ პერსონალს უფლება აქვს სტუდენტს მისცეს ზეპირი გაფრთხილება.

4.3. ამ კოდექსის 3.2.6 პუნქტით (უნივერსიტეტის ტერიტორიის დანაგვიანება) გათვალისწინებული ქმედების ჩადენისას უნივერსიტეტის ადმინისტრაცია აკისრებს ჯარიმას - 5 ლარის ოდენობით.

4.4. ამ კოდექსის 3.2.2 პუნქტით (თამბაქოს მოწევა შენობაში ან საამისოდ ნებადართული ტერიტორიის ფარგლებს გარეთ) გათვალისწინებული ქმედების ჩადენისას უნივერსიტეტის ადმინისტრაცია სტუდენტს აკისრებს ჯარიმას - 20 ლარის ოდენობით.

4.5. ამ კოდექსის 3.2.3 პუნქტით (ალკოჰოლური სასმელების შეტანა, გავრცელება ან/და მოხმარება, თუ ღონისძიება სპეციალურად არ არის ორგანიზებული ან ნებადართული უნივერსიტეტის მიერ) გათვალისწინებული ქმედების ჩადენისას უნივერსიტეტის ადმინისტრაცია სტუდენტს აკისრებს ჯარიმას - 50 ლარის ოდენობით.

4.6. ამ კოდექსის 3.2.4 პუნქტით (აზარტული თამაშების ორგანიზება ან მათში მონაწილეობის მიღება) გათვალისწინებული ქმედების ჩადენისას უნივერსიტეტის ადმინისტრაცია სტუდენტს აკისრებს ჯარიმას - 100 ლარის ოდენობით.

4.7. ამ კოდექსის 3.2.5 პუნქტით (უნივერსიტეტის ქონების დაზიანება) გათვალისწინებული ქმედების ჩადენისას უნივერსიტეტის აკადემიური საბჭო განსაზღვრავს და სტუდენტს აკისრებს მიყენებული ზიანის პროპორციულ ჯარიმას. ამასთან, სტუდენტი ვალდებულია სრულად აანაზღაუროს დაზიანებული საკუთრების ღირებულება;

4.8. ამ კოდექსის 3.2.9 პუნქტით (სხვა პირის მიმართ ძალადობა ან მისთვის ფიზიკური შეურაცხყოფის მიყენება) გათვალისწინებული ქმედების ჩადენისას:

4.8.1. უნივერსიტეტის ადმინისტრაცია აღნიშნულ ფაქტს ატყობინებს პოლიციას;

4.8.2. უნივერსიტეტის აკადემიური საბჭო უფლებამოსილია დარღვევის სიმძიმის გათვალისწინებით მიიღოს ერთ-ერთი შემდეგი გადაწყვეტილება:

4.8.2.1. სტუდენტს მისცეს წერილობითი გაფრთხილება;

4.8.2.2. სტუდენტს დააკისროს ჯარიმა - 200 ლარამდე ოდენობით;

4.8.2.3. სტუდენტს შეუწყვიტოს სტუდენტის სტატუსი.

4.9. ამ კოდექსის 3.2.10 (ნარკოტიკული ან/და ფსიქოტროპული საშუალებების შეტანა, გავრცელება ან/და გამოყენება) 3.2.11 (ცეცხლსასროლი/ცივი იარაღის შეტანა, გამოყენება, სხვისთვის გადაცემა) და 3.2.12 (ისეთი ფეთქებადი და აალებადი ნივთებისა და ნივთიერებების შეტანა, გამოყენება, გავრცელება ან სხვისთვის გადაცემა, რომლებიც ხანძრის ან/და აფეთქების რეალურ საფრთხეს ქმნის) პუნქტებით გათვალისწინებული ქმედების ჩადენისას:

4.9.1. უნივერსიტეტის ადმინისტრაცია აღნიშნულ ფაქტს ატყობინებს პოლიციას;

4.9.2. უნივერსიტეტის აკადემიური საბჭო სტუდენტს უწყვეტს სტუდენტის სტატუსს.

4.10. ამ კოდექსის 3.2.13 პუნქტით (სხვა პირზე ფსიქოლოგიური ზეწოლა, მუქარა, დაშინება ან მორალური ზემოქმედება), 3.2.14 პუნქტითა (სხვა პირის დისკრიმინაცია) და 3.2.15. პუნქტით (სხვა სტუდენტის საკუთრების ხელყოფა, დაზიანება ან განადგურება; ასევე, სხვა სტუდენტის საკუთრების უფლების რაიმე სახით შეზღუდვა, მათ შორის, ნივთის დაუფლება და ფაქტობრივი ფლობა მესაკუთრის ნების საწინააღმდეგოდ, ნივთის მოტყუებით გამორთმევა ან გამოძალვა, ან ნივთის ბედის სხვაგვარი გადაწყვეტა) გათვალისწინებული ქმედების განხორციელებისას ეთიკის საბჭო იღებს სტუდენტის წერილობითი გაფრთხილების გადაწყვეტილებას, რომელსაც გადასცემს უნივერსიტეტის სარეგისტრაციო ოფისს სტუდენტის შესახებ არსებულ აკადემიურ ჩანაწერებში რეგისტრაციის მიზნით. იგივე ქმედების განმეორების შემთხვევაში, ეთიკის საბჭო იღებს სტუდენტის სტატუსის შეწყვეტის გადაწყვეტილებას. ეთიკის საბჭო უფლებამოსილია დარღვევის სიმძიმის გათვალისწინებით მიიღოს სტუდენტის სტატუსის შეწყვეტის გადაწყვეტილება.

4.11. უნივერსიტეტის აკადემიური საბჭოს გადაწყვეტილება დაუყოვნებლივ გადაეცემა უნივერსიტეტის სარეგისტრაციო ოფისს სტუდენტის შესახებ არსებულ აკადემიურ ჩანაწერებში რეგისტრაციის მიზნით.

4.12. პასუხისმგებლობის სახით ჯარიმის გამოყენების შემთხვევაში, სტუდენტი ვალდებულია მისთვის უნივერსიტეტის აკადემიური საბჭოს გადაწყვეტილების ჩაბარებიდან 30 კალენდარული

დღის ვადაში დაკისრებული ჯარიმის შესატყვისი თანხა გადარიცხოს უნივერსიტეტის შემდეგ ანგარიშზე:

შპს "თბილისის თავისუფალი უნივერსიტეტი"

ს/ნ 211359448

ს.ს. ზაზის ბანკი

CBASGE22

ა/ა GE94BS000000053536651

### მუხლი 5. აკადემიურ პროცესთან დაკავშირებული ეთიკის წესები

5.1. სტუდენტის მიმართ ამ კოდექსით დადგენილი დისციპლინური პასუხისმგებლობის ზომები გამოიყენება აკადემიურ პროცესთან დაკავშირებული შემდეგი წესების დარღვევის შემთხვევაში:

5.1.1. აკადემიური თაღლითობა (გადაწერა სხვა სტუდენტის ნამუშევრიდან, ან ნებისმიერი სახის წინასწარ მომზადებული დამხმარე მასალის, სხვადასხვა ტექნიკური საშუალებების გამოყენება, რომელიც არ არის ნებადართული, როგორც უნივერსიტეტის ტერიტორიაზე, ასევე მის ფარგლებს გარეთ);

5.1.2. პლაგიატი (სრულად ან ნაწილობრივ სხვისი ნამუშევრის გადაწერა ავტორისა და წყაროს მითითების გარეშე; სხვა პირის წერილობითი აკადემიური ნაშრომის ან მისი ნაწილის საკუთრად გასაღება);

5.1.3. სხვა სტუდენტისათვის ხელის შეშლა სწავლასა და კვლევის პროცესში საჭირო რესურსების დამალვით, მოპარვით ან განადგურებით; სხვა სტუდენტის ნამუშევრის მოპარვა, განადგურება, შეცვლა;

5.1.4. სხვა სტუდენტისათვის აკადემიური თაღლითობის ჩადენაში ხელის შეწყობა;

5.1.5. კვლევითი სამუშაოების მონაცემებისა და შედეგების გაყალბება;

5.1.6. ინდივიდუალური დავალების ჯგუფურად მომზადება ან ერთი პირის მიერ მომზადებული დავალების ჯგუფურ ნამუშევრად გასაღება;

5.1.7. იდენტობის გაყალბების საშუალებით, სხვა პირთან გარიგება გამოცდის ჩაბარების მიზნით;

5.1.8. საგამოცდო მასალების, მათ შესახებ კონფიდენციალური ინფორმაციის მოპოვება, გავრცელება, ასევე ჩაბარებული წერილობითი ნამუშევრის უნებართვოდ ჩანაცვლება;

5.1.9. საუნივერსიტეტო მონაცემების (აკადემიური/ადმინისტრაციული) გაყალბება ან/და გამოყენება;

5.1.10. ლექტორზე, გამომცდელზე, უნივერსიტეტის თანამშრომელზე ზეწოლა შეფასების მიღების მიზნით;

5.1.11. უნივერსიტეტში წარსადგენი დოკუმენტის გაყალბება ან დოკუმენტების არასრულად წარდგენა.

## **მუხლი 6. პასუხისმგებლობა აკადემიურ პროცესთან დაკავშირებული ეთიკის წესების დარღვევისათვის**

6.1. ამ კოდექსის მე-5 მუხლით გათვალისწინებული ქმედების ჩადენის გამო სტუდენტის პასუხისმგებლობის სახესა და ზომას კონკრეტული დარღვევის შინაარსის, ხასიათისა და გარემოებების გათვალისწინებით, განსაზღვრავს უნივერსიტეტის აკადემიური საბჭო.

6.2. ამ კოდექსის 5.1.1 პუნქტით (აკადემიური თაღლითობა), 5.1.7 პუნქტით (იდენტობის გაყალბების საშუალებით, სხვა პირთან გარიგება გამოცდის ჩასაბარების მიზნით), 5.1.9 პუნქტით (საუნივერსიტეტო მონაცემების (აკადემიური/ადმინისტრაციული) გაყალბება ან/და გამოყენება), 5.1.8 პუნქტით (საგამოცდო მასალების, მათ შესახებ კონფიდენციალური ინფორმაციის მოპოვება, გავრცელება, ასევე ჩაბარებული წერილობითი ნამუშევრის უნებართვოდ ჩანაცვლება) გათვალისწინებული ქმედების ჩადენისას სტუდენტის ნამუშევარს ლექტორი/სკოლის ადმინისტრაცია აფასებს 0 ქულით, ხოლო უნივერსიტეტის აკადემიური საბჭო იღებს სტუდენტის წერილობითი გაფრთხილების ან სტუდენტის სტატუსის შეწყვეტის გადაწყვეტილებას, რომელსაც გადასცემს უნივერსიტეტის სარეგისტრაციო ოფისს სტუდენტის შესახებ არსებულ აკადემიურ ჩანაწერებში რეგისტრაციის მიზნით.

6.3. ამ კოდექსის 5.1.2 პუნქტით (პლაგიატი), 5.1.6 პუნქტით (ინდივიდუალური დავალების ჯგუფურად მომზადება ან ერთი პირის მიერ მომზადებული დავალების ჯგუფურ ნამუშევრად გასაღება), გათვალისწინებული ქმედების ჩადენისას სტუდენტს შესაბამის საგანში/სასწავლო კურსში ეწერება შეფასება F, ხოლო უნივერსიტეტის აკადემიური საბჭო იღებს სტუდენტის წერილობითი გაფრთხილების გადაწყვეტილებას, რომელსაც გადასცემს უნივერსიტეტის სარეგისტრაციო ოფისს სტუდენტის შესახებ არსებულ აკადემიურ ჩანაწერებში რეგისტრაციის მიზნით. იგივე ქმედების განმეორების შემთხვევაში, ეთიკის საბჭო იღებს სტუდენტის სტატუსის შეწყვეტის გადაწყვეტილებას. ეთიკის საბჭო უფლებამოსილია დარღვევის სიმძიმის გათვალისწინებით მიიღოს სტუდენტის სტატუსის შეწყვეტის გადაწყვეტილება.

6.4. ამ კოდექსის 5.1.3 პუნქტში (სხვა სტუდენტისათვის ხელის შეშლა სწავლასა და კვლევის პროცესში საჭირო რესურსების დამალვით, მოპარვით ან განადგურებით; სხვა სტუდენტის ნამუშევრის მოპარვა, განადგურება, შეცვლა) გათვალისწინებული ქმედების ჩადენისას უნივერსიტეტის აკადემიური საბჭო იღებს სტუდენტის წერილობითი გაფრთხილების გადაწყვეტილებას, რომელსაც გადასცემს უნივერსიტეტის სარეგისტრაციო ოფისს სტუდენტის შესახებ არსებულ აკადემიურ ჩანაწერებში რეგისტრაციის მიზნით. იგივე ქმედების განმეორების შემთხვევაში, ეთიკის საბჭო იღებს სტუდენტის სტატუსის შეწყვეტის გადაწყვეტილებას. ეთიკის

საბჭო უფლებამოსილია დარღვევის სიმძიმის გათვალისწინებით მიიღოს სტუდენტის სტატუსის შეწყვეტის გადაწყვეტილება.

6.5. ამ კოდექსის 5.1.4 პუნქტით (სხვა სტუდენტისათვის აკადემიური თაღლითობის ჩადენაში ხელის შეწყობა), 5.1.5 პუნქტით (კვლევითი სამუშაოების მონაცემებისა და შედეგების გაყალბება), 5.1.10 პუნქტით (ლექტორზე, გამომცდელზე, უნივერსიტეტის თანამშრომელზე ზეწოლა შეფასების მიღების მიზნით) გათვალისწინებული ქმედების ჩადენისას უნივერსიტეტის აკადემიური საბჭო იღებს სტუდენტის წერილობითი გაფრთხილების გადაწყვეტილებას, რომელსაც გადასცემს უნივერსიტეტის სარეგისტრაციო ოფისს სტუდენტის შესახებ არსებულ აკადემიურ ჩანაწერებში რეგისტრაციის მიზნით. იგივე ქმედების განმეორების შემთხვევაში, ეთიკის საბჭო იღებს სტუდენტის სტატუსის შეწყვეტის გადაწყვეტილებას. ეთიკის საბჭო უფლებამოსილია დარღვევის სიმძიმის გათვალისწინებით მიიღოს სტუდენტის სტატუსის შეწყვეტის გადაწყვეტილება.

6.6. ამ კოდექსის 5.1.11 პუნქტით (უნივერსიტეტში წარსადგენი დოკუმენტის გაყალბება) გათვალისწინებული ქმედების ჩადენისას უნივერსიტეტის ადმინისტრაცია ან შესაბამისი უფლებამოსილებით აღჭურვილი ორგანო აუქმებს ასეთ დოკუმენტზე დაყრდნობით მიღებულ გადაწყვეტილებას, უნივერსიტეტის აკადემიური საბჭო იღებს სტუდენტის სტატუსის შეწყვეტის გადაწყვეტილებას, ხოლო უნივერსიტეტის ადმინისტრაცია მიმართავს სამართალდამცავ ორგანოებს დოკუმენტის გაყალბებასთან დაკავშირებული საკითხის შესწავლის მოთხოვნით.

## **მუხლი 7. დისციპლინური წარმოების განხორციელების წესი**

7.1. ეთიკის საერთო და აკადემიურ პროცესთან დაკავშირებული წესების დარღვევის ფაქტებზე სტუდენტის მიმართ დისციპლინური ღონისძიებების გატარების საკითხის აღძვრა შეუძლია უნივერსიტეტის აკადემიურ ან პედაგოგიურ საქმიანობაში ჩართულ ნებისმიერ პირს, ასევე, ადმინისტრაციის ნებისმიერ თანამშრომელს.

7.2. ამ კოდექსით გათვალისწინებული ქმედების ჩადენის გამო დისციპლინურ წარმოებას ახორციელებს უნივერსიტეტის აკადემიური საბჭო.

7.3. დისციპლინური წარმოების განხორციელებისას სტუდენტს უფლება აქვს:

7.3.1. უნივერსიტეტისაგან მიიღოს შეტყობინება მის მიმართ დისციპლინური წარმოების დაწყების შესახებ;

7.3.2. დაესწროს მის მიმართ დისციპლინური წარმოების საკითხის განხილვას, დაიცვას საკუთარი უფლებები დამოუკიდებლად ან წარმომადგენლის მეშვეობით;

7.3.3. მიაწოდოს უნივერსიტეტის აკადემიურ საბჭოს თავის ხელთ არსებული ინფორმაცია და მტკიცებულებები;

7.3.4. მონაწილეობა მიიღოს უნივერსიტეტის აკადემიური საბჭოს მიერ მოპოვებული

მტკიცებულებების გამოკვლევაში;

7.3.5. სასამართლოში გაასაჩივროს უნივერსიტეტის მიერ მის მიმართ მიღებული გადაწყვეტილება.

7.4. უნივერსიტეტის აკადემიური საბჭო უფლებამოსილია:

7.4.1. მოსთხოვოს სტუდენტს საკუთარი მოქმედების ზეპირი ან/და წერილობითი აღწერა და განმარტება;

7.4.2. მრავალმხრივ და სრულყოფილად გამოიკვილოს წარდგენილი ინფორმაცია, მტკიცებულებები, გარემოებები;

7.4.3. ამ კოდექსით გათვალისწინებული დარღვევისათვის სტუდენტს შეუფარდოს შესაბამისი პასუხისმგებლობის სახე და ზომა.

7.5. დისციპლინური პასუხისმგებლობის დაკისრების თაობაზე აკადემიური საბჭოს გადაწყვეტილებას ხელს აწერს უნივერსიტეტის რექტორი/კანცლერი, საკუთარი კომპეტენციის ფარგლებში.

7.6. უნივერსიტეტის აკადემიური საბჭო უფლებამოსილია განიხილოს და სტუდენტს დააკისროს ამ კოდექსით გათვალისწინებული დისციპლინური პასუხისმგებლობა ისეთი ქმედების ჩადენის შემთხვევაში, რომელიც საქართველოს ადმინისტრაციულ სამართალდარღვევათა კოდექსისა და საქართველოს სისხლის სამართლის კოდექსით გათვალისწინებულ დასჯად ქმედებას განეკუთვნება.

7.7. სტუდენტის წერილობითი გაფრთხილებიდან 12 თვის გასვლის შემდეგ, ამ კოდექსის განმეორებით დარღვევის შემთხვევაში, აკადემიური საბჭო უფლებამოსილია სტუდენტს შეუწყვიტოს სტუდენტის სტატუსი.

7.8. ეთიკის საბჭო უფლებამოსილია იმსჯელოს სტუდენტის სტატუსის შეწყვეტის თაობაზე, თუ სტუდენტის შესახებ აკადემიურ ჩანაწერებში რეგისტრირებულია ერთზე მეტი წერილობითი გაფრთხილება.

## **მუხლი 8. დასკვნითი დებულებანი**

8.1. უნივერსიტეტი უფლებამოსილია შეიტანოს ცვლილებები ამ კოდექსში, რაც არ უნდა ლახავდეს სტუდენტის უფლებებს და არ უნდა იწვევდეს მხარეთა შორის არსებული სამართლებრივი ურთიერთობის არსის შეცვლას.

8.2. უნივერსიტეტი ვალდებულია ცვლილების შეტანის შესახებ ინფორმაცია დაუყოვნებლივ გამოაქვეყნოს უნივერსიტეტის ვებ-გვერდზე.

8.3. ამ კოდექსის რომელიმე დებულების ბათილად ან ძალადაკარგულად ცნობა გავლენას არ ახდენს კოდექსის სხვა მუხლების იურიდიულ ძალაზე.